

PATXI LOPEZ BIZKAIKO PSE-EE-KO IDAZKARI NAGUSIA

«Prest gaude 'estatu gaietan' jeltzaleekin akordioak lortzeko»

Maiatzaren 13ko hauteskundeen ostean, PSE-EEko kideak hausnarketa prozesuan dabilta buru-belarri. Bizkaiko sozialisten idazkari nagusiak aurreko estrategia «zuzena» izan zela dioen arren, EAJrekiko beste jarrera bat eskatzen du hemendik aurrera.



XOUSE SIMAL

PRINTZPIOAK

«Kanpainan guk printzipioen alde egin dugu, eta PP, agian, horietaz baliatu da nazionalismoari erasotzeko»

EAJ-REN HELBURUAK

«Indarkeria desagertu bitartean, bere eskakizunak atzeratu egin beharko lituzke EAJk»

OPOSIZIO MOTA

«Lehen egiten genuen oposizio motak ez du zentzurik orain; eraikitzailea izan behar du»

Joseba Arruti | BILBO

Patxi Lopezek oso adeitsu hartu gintuen, Bizkaiko PSE-EEren egoitzan, alderdiko Batzorde Nazionala bildu aurretik. Haren ustez, maiatzaren 13ko bozen ostean sozialistek «beti izan duten zubigintza lanean» jardun behar dute berriro.

■ **Hauteskundeetatik aste batzuk igaro direnean, zein balorazio egiten duzu mapa politiko berriaz?**

Lehenik eta behin, parte-hartze maila historikoa nabarmenduko nuke. Herritarrek bakearen eta askatasunaren alde bozkatu dute eta, indarkeriaz baliatzen direnak izan ezik, herri honetan

beste inor soberan ez dagoela esan digute. Gainera, EAJ-EAko nazionalisten aldeko elkartasunezko boto zabala egon da eta PPren porrota ere bai, alternatiba gisa aurkeztu baitziren.

■ **PPri estu lotuta aurkeztu zarete, haiekiko segidismoa egitea egozteraino, eta legebiltzarkide bat galdu duzue.**

Agian irudi hori eman diogu gizaritari, batzuetan beste alderdiei ere hori interesatzen zitzaielako. EAJri PPSOEz hitz egitea komeni zitzaion, eta PPri, berriz, aliatu bat izatea. Guretzat zaila izan da ezberdintasunak nabarmentzea, printzipioen aldeko kanpaina egin behar izan dugulako: askatasunaren,

bakearen eta bizitzaren aldekoa, hain zuzen; baina baita Konstituzioak eta Estatutuak zehazten duten bizikidetzaren aldekoa ere. Guk printzipio horien alde egin dugu, eta PPk, agian, horiek baliatu ditu nazionalismoaren aurka jotzeko, biolentoak direnak eta ez direnak bereizi gabe.

■ **Ibarretzek bozetatik hona egin dituen urratsak ontzat jo dituzue.**

EAJk bide soberanistatik edo autonomistatik jo nahi duen aukeratzeko modua dauka. Azken aukera horrek ez du esan nahi bere ideologiari uko egin behar dionik, baina indarkeria desagertu bitartean, EAEn normal-

tasun demokratikorik ez dagoen artean, bere eskakizunak atzeratu beharko lituzke. Indarkeriari elkarrekin aurre egiteko, alderdion interesen gainetik gizaritearenak jarri behar dira, eta Ibarretzek hortik jo duela ematen du. Denbora eman behar zaio, esan duena praktikara eraman dezan, baina gu prest gaude *Estatu gaiak* dei ditzakegunetan ados jartzeko.

■ **Giro horrek Jaurlaritzarako bidea zabal liezazueke udal hauteskundeen ostean?**

Ez gaude horrekin itsututa. Herritarrek EAJ-EAri eman diote Gobernua osatzeko ardura, eta sozialistek oposizioan egoteko nahia azaldu dute. Dena den,

azken etapa honetako oposizio motak ez du zentzurik orain, eta lan eraikitzaileagoa egin beharko dugu.

■ **Oposizio mota berri hori aurrekoa egin duten pertsona berberak zuzendu behar al dute PSE-EEen?**

Nire iritziz, bai. Momentu politiko bakoitzean estrategia bat jarri behar da abian, eta oposizioa erradikalizatzeko hartu genuen erabakia zuzena izan zen orduan. Izan ere, erabateko polarizazioa zegoen EAJren eta PPren artean, eta arrazoizko espazioa, zubigintzako, guri dagoiguna, ia ez zen existitzen, eta oposizio erradikal hori egin ez bagenu, gaur egun ez ginatke mapa politikoan ere egongo.

■ **Zer irudituko litzaizuke EB-IU Jaurlaritzan sartuko balitz?**

Lehenengo hori ikusi nahi dut. EB-IUk asko hitz egiten du bera Jaurlaritzan egoteko bira sozial bat eman beharko dela, baina hori azalean geratzea baino ez dela ematen du. EAJ eta EAekin batera aritzen bada, gehiago izango da bere interesei erreparatzen dielako beste edozergatik baino.

■ **Urrian Galiziako bozak egingo dira eta bi urte barru Kataluniakoak. Erkidego bietako hautagai sozialistak estatutu eredu federalaren alde daude. Zer oihartzun du horrek EAEko sozialistengan?**

Ondo entzun beharko litzaieke zer esan nahi duen eredu federal asimetrikoa deitzen duten horrek. Esparru aurreratuago batera joaterik dugun hausnartzea ona da, baina Euskal Herrian horrelako eztabaidak distortsionatzen dituen indarkeria da. Zure ideiak defendatzearren hiltzen zaituztenean ezin zara guztiok erosoago egongo garen esparru baten inguruan pentsatzen ibili. Hala, nire ustez, Euskal Herrian egon zitekeen aurrerapen abertzalea ETAK gerarazi du neurri handi batean. Baina gu ados gaude Estatutuak aurreikusten dituen potentzialtasun guztiak aztertzearekin.

■ **Odon Elorzak sozialismo euskaltzaleago bat eskatu die...**

Nik ez dakit *euskaltzale* hitz horrek zer esan nahi duen. Euskal Herriaren alde lan egitea bada, edonor bezain euskaltzaleak gara: Guk sortu genuen Osakidetza, Euskal Eskola Publikoa berregituratu genuen, Bilboko Metroa... Dena den, beharbada, jendea ez zaio hori heltzen. Boz hauetan batzuk uste zuten PPekin batera euskara debekatuko genuela... Horrelakoak ezin dira pentsatu euskal sozialistoz.